

大字圈  
點註釋

三十六子全書





篤素堂者

聖祖皇帝御書賜張文端公扁額也文端名所著曰篤素堂集而恆產瑣言總訓齋語列其中同治壬戌吾父手寫恆產瑣言藏之家塾比歲德鈞守龍安郡劍州李申夫方伯主講龍州書院言在湖北臬司任時曾刊恆產瑣言聰訓齋語二種爰取而再刻之仍名篤素堂集鈔云光緒十四年三月蔣德鈞識

恆產瑣言聰訓齋語二種乃桐城張文端公所著本刻篤素堂彙集中後人或鈔出單行所言皆剗切詳明娓娓動聽裨益身心良非淺鮮爰重付剗刷以廣流傳光緒十七年孟夏湘鄉陳湜識



桐城張英敦復

恆產瑣言

三代而上。田以井授民。二十受田。六十歸田。尺寸之地。皆國家所有。民間不得而私之。至秦以後。廢井田。開阡陌。百姓始得私相買賣。然則三代以上。雖至貴鉅富。求數百畝之田。貽子及孫。不可得也。後世既得而買之矣。以乾坤之大塊。國家之版圖。聽人畫界分疆。立書契評價直而鬻之。縣官雖有易姓改氏。而田主自若。董江都諸人。亦憤貧者無立錫之地。而富者田連阡陌。欲行限民名田之法。立為節制而不果行。其乃祖乃父。以一朝之力。而竟奄有之。使後人食土之毛。善守而不輕棄。則子孫百世。苟不至經變亂。亦斷不能為他人之所有。嗚呼。深念及此。其可不思所以保之哉。

人家子弟。從小便讀孟子。每習焉而不察。夫孟子以王佐之才。說齊宣梁惠。議論濶大。志趣高遠。然言病雖多端。用藥止一味。曰有恆產者有恆心而已。曰五畝之宅百畝之田而已。曰富歲子弟多賴而已。重見疊出。一部孟子。實落處不

過此數條而終之曰諸侯之寶三土地。又嘗讀蘇長公集。其天才橫軼古今無儔匹。宜若不屑屑生計者。遊金山之詩曰。有田不去如江水。遊焦山之詩曰。無田不去寧非貧。其題王晉卿煙江疊嶂圖詩亦曰。不知人間何處有此境。徑欲往買二頃田。可知此老胸中。時時有此一段經畫。生平欲買陽羨之田。至老而其願不償。今人動言才子名士偉丈夫。不事家人生產。究至謀生無策。犯孟子之戒而不悔。豈不深可痛惜哉。

天下之物有新則必有故。屋久而頽。衣久而敝。臧獲牛馬。服役久而老且死。當其始重價以購。越十年而其物非故矣。再越十年而化為烏有矣。獨有田之為物。雖百年千年而常新。即或農力不勤。土敝產薄。一經糞溉則新矣。即或荒蕪草宅。一經墾闢則新矣。多興陂池。則枯者可以使之潤。勤薅茶蓼。則瘠者可以使之肥。亘古及今。無有朽蠹頽壞之慮。逃亡耗缺之憂。嗚呼。是洵可寶也哉。

吾友陸子名遇霖。字洵若。浙江人。今為歸德別駕。其人通曉事務。以經濟自許。在京師日。常與之過從。一日從容談及謀生畢竟以何者為勝。陸子思之良久。曰。予閱世故多矣。典質貿易。權子母。斷無久而不弊之理。始雖乍獲厚利。終必

化為子虛。惟田產房屋二者可持以久遠。以二者較之。房舍不如田產。何以言之。房產乃向人索租錢。每至歲暮。必有幹僕盛衣帽著靴。誼譁叫號以取之。不償則愬于官長。每至爭訟。雀角甚有以奮鬪窘迫。而別生禍殃者。稍懦焉。則又不可得矣。至田租則不然。子孫雖為齊民。極單寒懦弱。其僕不過青鞵布襪。手持雨傘。詣佃人之門。而人不敢藐視之。秋穀登場。必先完田主之租。而後分給私債。取其所本有。而非索其所無。與者受者。皆可不勞。且力田皆愿民。與市廛商賈之狡健者不同。以此思之。房產殆不如也。予至今有味乎陸子之言。嘗讀雅頌之詩。而歎古人之于先疇。如此其重也。楚茨大田之詩。皆公卿有田祿者。周有世卿。其祖若父之采地。傳諸後人。故曰曾孫。今觀其言曰。我疆我理。曰我田既臧。曰我黍稷。我倉我庾。農夫愛其曾孫。則曰曾孫不怒。曾孫愛其農夫。則曰農夫之慶。以至攘籩者之食。而嘗其旨否。剝疆場之瓜。而獻之皇祖。何其民風淳樸。上下相親如此。不止家給人足。無分外之謀。而且流風餘韻。有為善之樂。後人有祖父遺產。正可循隴觀稼。策蹇課耕。雅頌之景。如在目前。而乃視為鄙事。不一留意。抑獨何哉。



今人家子弟鮮衣怒馬。恆舞酣歌。一裘之費。動至數十金。一席之費。動至數金。不思吾鄉十餘年來。穀賤。竭十餘石。穀不足供一筵。竭百餘石。穀不足供一衣。安知農家作苦終年。霑體塗足。豈易得此百石。況且水旱不時。一年收穫。不能保諸來年。聞陝西歲饑。一石價至六七兩。今以如玉如珠之物。而賤價糶之。以供一裘一席之費。豈不深可懼哉。古人有言。惟土物愛厥心臧。故子弟不可不令其目擊田家之苦。開倉糶穀時。當令其持籌。以壯夫之力。不過擔一石四五壯夫之所擔。僅得價一兩。隨手花費。了不見其形跡。而已倉庾空竭矣。使稍有知覺。當不忍于浪擲。奈何深居簡出。但知飽食暝衣。絕不念物力之可惜。而泥沙委之哉。

天下貨材所積。則時時有水火盜賊之憂。至珍異之物。尤易招尤速禍。草野之人。有十金之積。則不能高枕而卧。獨有田產。不憂水火。不憂盜賊。雖有強暴之人。不能竟奪尺寸。雖有萬鈞之力。亦不能負之而趨。千頃萬頃。可以值萬金之產。不勞一人守護。即有兵燹離亂。背井去鄉。事定歸來。室廬蓄聚。一無可問。獨此一塊土。張姓者仍屬張。李姓者仍屬李。芟夷壑闢。仍為殷實之家。嗚呼。舉天

下之物不足較其堅固其可不思所以保之哉

予與四方之人從容閒談則必詢其地土物產之所出以及田里之事大約田產出息最微較之商賈不及三四天下惟山右新安人善於貿易彼性至慳嗇能堅守他處人斷斷不能然亦多覆蹶之事若田產之息月計不足歲計有餘歲計不足世計有餘嘗見人家子弟厭田產之生息微而緩羨貿易之生息速而饒至鬻產以從事斷未有不全軍盡沒者余身試如此見人家如此千百不爽無論愚弱者不能行即聰明強幹者亦行之而必敗人家子弟萬萬不可錯此著也人思取財於人不若取財於天地余見放債收息以及典質人之田產者三年五年得其息如其所出之數其人則嘵嘵有詞矣不然則怨于心德于色浸假而並沒其本閒有酷貧之士得數十金可暫行于一時稍裕則不能矣惟地德則不然薄植之而薄收厚培之而厚報或四季而三收或一歲而再種中田以種稻麥旁畦餘隴以植麻菽衣棉之類有尺寸之壤則必有錙銖之入故曰地不愛寶此言最有味始而養其祖父既而養其子孫無德色無倦容無竭歡盡忠之怨有日新月盛之美受之者無愧怍享之者無他虞雖多方以取而無罔

利之咎。上可以告天地。幽可以對鬼神。不勞心計。不受人忌疾。嗚呼。天下更有物焉。能與之比長絜短者哉。

余既言田產之不可鬻。而世之鬻產者比比而然。聰明者亦多為之。其根源則必在乎債負。債負之來。由於用度不經。不知量入為出。至舉息既多。計無所出。不得不鬻累世之產。故不經者債負之由也。債負者鬻產之由也。鬻產者饑寒之由也。欲除鬻產之根。則斷自經費始。居家簡要可久之道。則有陸梭山量入為出之法。在其法合其一歲之所入。除完給公家而外。分為三分。留一分為歛。年不收之用。其二分分為十二分。一月用一分。若歲常豐收。則是古人耕三餘一之法。值一歲歉。則以一歲所留補給。連歲歉。則以積年所留補給。如此始無舉債之事。若一歲所入。止給一歲之用。一遇水旱。則產不可保矣。此最目前可見之理。而人不知察。陸梭山之法最詳。即百金之產。亦行此法。使必富饒而後可行。則大誤矣。且其法于十二分又分三十小分。余恐其太煩。故止作十二分。要知古人之意。全在小處節儉。大處之不足。由于小處之不謹。月計之不足。由于每日之用過多也。若能從梭山每月三十分之。更為穩實。一月之中。飲食應



酬宴會。稍可節者。節之。以此一月之所餘。另置一封。以周貧乏親戚些小之急。更覺心安意適。此專言費用不經。舉債而鬻產之由。此外則有賭博狹邪侈靡。其為敗壞者。無論矣。更有因婚嫁而鬻業者。絕為可哂。夫有男女。則必有婚嫁。只當以豐年之所積。量力治裝。奈何鬻累世仰事俯育之具。以圖一時之華美。豈既婚嫁後。遂可不食而飽。不衣而溫乎。嗚呼。亦愚之甚矣。

吾既言產之斷不可鬻。雖然。鬻產之家。豈得已哉。其平時費用不經。以致舉債而鬻產。吾既詳言之矣。處承平之日。行量入為出之法。自不致狼狽困頓。而為此。獨是一遇兵燹。則必有水旱。水旱則必逃亡。逃亡則田必荒蕪。荒蕪則穀入必少。此時賦稅必多。而且急。數端相因而至。乃必然之理。有田之家。其為苦累。較常人更甚。此時輕棄賤鬻。以圖免追呼。實必至之勢也。然天下亂離日少。太平日多。及其平定。而產業既鬻于人。向時富厚之子。今無立錫矣。此時當大有忍力。咬定牙根。平時少有積蓄。或鬻衣服。或鬻簪珥。或鬻臧獲。藉以完糧。打疊精神。招佃闢墾。乘閒投隙。收取些須。以救旦夕。穀食不足。充以糟糠。凡百費用。盡從吝嗇。千辛萬苦。以保守先業。大約不過一二年。過此凶險。仍可耕耘收獲。不

失為殷厚之家。此亦予所目擊者。譬如熬過隆冬。返寒。春明一到。仍是柳媚花明矣。此際全看力量。其更有心計之人。于此時收買賤產。其益宏多。吾鄉草野起家之人。多行此法。

吾既極言產之不可鬻矣。雖然守之有道。不可不講。不善經理。付之僮僕之手。任其耗蠹。積日累月。沃者變而為瘠。潤者化而為枯。稍瘠者化而為石田。田瘠而畝不減。入少而賦不輕。平時僅可支持。一遇水旱。催科則立槁矣。是田本為養生之物。變而為累身之物。且將追怨祖父。留此累物以貽子孫。予見此亦不少矣。然則如之何而可哉。欲無鬻產。當思保產。欲保產。當使盡地利。盡地利之道有二。一在擇莊佃。一在興水利。諺云。良田不如良佃。此最確論。主人雖有氣力心計。佃惰且劣。則田日壞。譬如父母雖愛嬰兒。卻付之悍婢之手。豈能知其疾苦乎。良佃之益有三。一在耕種及時。一在培壅有力。一在畜洩有方。古人言農最重時。早犁一月。有一月之益。故冬最良。春次之。早種一日。有一日之益。故晚禾必在秋前一日。至培壅。則古人所云百畝之糞。又云凶年糞其田而不足。詩云。荼蓼朽止。黍稷茂止。用力如此。一畝可得兩畝之入。地不加廣。畝不加增。

佃有餘而主人亦利矣。畜水用水最有緩急。先後當救則救。當待則待。當棄則棄。惟有良農老農知之。劣農之病有三。一在耕稼失時。一在培壅無力。一在畜洩無方。若遇豐稔之年。雨澤應時而降。惰農劣農亦鹵莽收穫。隱藏其害而不覺。一遇旱乾。則彼之優劣立見矣。凶年主人得一石。可值兩石。而受此劣佃之害。悔何及哉。人家僮僕管莊務。每喜劣佃而不喜良佃。良佃則家必殷實。有體面。不肯諂媚人。且性必梗直樸野。飲食必節儉。又不聽僮僕之指使。劣佃則必惰而且窮。諂媚僮僕。聽其指使。以任其饕餮。種種情狀不同。此所以性喜劣佃而不喜良佃。至主人之田疇美惡。彼皆不顧。且又甚樂于水旱。則租不能足額。而可以任其高下。此積弊陋習。安可不知。且良佃所居。則屋宇整齊。場圃茂盛。樹木蔥鬱。此皆主人僮僕力之所不能及。而良佃自為之。劣佃則件件反是。此擇莊佃為第一要務也。禾在田中。以水為命。諺云。肥田不敵瘦水。雖有膏腴。若水澤不足。則亦等石田矣。江南有塘有堰。古人開一畝之田。則必有一畝之水。以濟之後人。狃于多雨之年。塘堰都不修治。堰則破壞不畜水。塘則淺且漏。不容水。每歲方春時。必有洪雨數次。任其橫流而不收。入夏亢旱。束手無策。仰天



長歎而已。人家僮僕管理莊事。以興塘幾石。修屋幾石。為開帳時浮圖合共之具而已。何嘗有寸土一錘。及于塘堰乎。夫塘宜深且堅固。余曾過江甯南鄉。其田最號沃壤。其塘甚小。不及半畝。詢之土人。知其深且陡。有及二丈者。故可以溉數十畝之田而不匱。吾鄉塘最多且大。有數畝者。有十數畝者。然淺且漏。大雨後亦不滿。稍旱則露底。田待此為命。其何益之有哉。向後興塘築堰。必躬自閱視。若有雨之年。塘猶不滿。其為滲漏可知。急加培築。大抵劣農之性情。而見識淺陋。每傲倖于歲之多雨。而不為預備。僮僕既以此開入花帳。又不便向主人再說。一遇亢旱。田禾立槁。日積月累。田瘠莊敝。租入日少。勢必驚變。此興水利為第一要務也。若不知務此而止。云保守前業。勢豈能由已哉。

予置田千餘畝。皆苦瘠。非予好瘠田也。不能多辦價值。故甯就瘠田。其膏腴沃壤。則大力者為之。余不能也。然細思膏腴之價。數倍于瘠田。遇水旱之時。膏腴亦未嘗不減。若豐稔之年。瘠土亦收。而租倍于膏腴矣。膏腴之所以勝者。驚時可以得善價。平時度日。同此稻穀一石耳。無大差別。且腴田不善經理。不數年變而為中田。又數年變而為下田矣。瘠田若善經理。則下田可使之為中田。

中田可使之為上田。雖不能大變能高一等。故但視後人之能保與不能保。不在田之瘠與不瘠。況名莊勝業。易為勢力家所垂涎。子弟鬻田。必先鬻善者。子家祖居田甚瘠。在當時興作盡善。故稱沃壤四世。祖東川公卒時。囑後人。莫于宅之左。曰。恐為勢家所奪。由此觀之。當時何嘗非善地。今始成瘠壤耳。惟視人之經理不經理也。嘗見荒瘠之地。見一二土著老農之家。則田疇開闢。陂池修治。禾稼茂鬱。廬舍完好。竹木周布。居然一佳產。其仕宦家之田。則荒敗不可觀而已。汝儕試留心察之。

人家子弟。每年春秋。當自往莊細看。平時無事。亦可策蹇一往。然徒往無益也。第一當知田界。田界不易識也。令老農指視一次。不能記而再三。大約五六次。便熟。有疑處。便問之。勿以曾經問過。嫌于再問。恐被人譏笑。則終身不知矣。第二當察農夫用力之勤惰。耕種之早晚。畜積之厚薄。人畜之多寡。用度之奢儉。善治田。以為優劣。第三當細看塘堰之堅窳。淺深。以為興作。第四察山林樹木之耗長。第五訪稻穀時值之高下。期于真知確見。若聽僮僕之言。深入茅檐。一坐一飯一宿。目不見田疇。足不履阡陌。僮僕糾諸佃人。環繞誼譁。或借種稻。或

借食租。或稱塘漏。或稱屋傾。以此恫喝主人。主人為其所窘。去之惟恐不速。問其疆界。則不知。問其孰勤孰惰。則不知。問其林木。則不知。問其價值。則不知。及入城遇朋友。則彼揖之曰。履畝歸矣。此笑之曰。循行阡陌回矣。主人方自謂吾從村莊來。勞苦勞苦。嗚呼。何益之有哉。此予少年所身歷者。至今悔之。大約人家子弟。最不當以經理田產為俗事鄙事而避此名。亦不當以為故事而襲此名。細思此等事。較之持鉢求人。奔走囁嚅。孰得孰失。孰貴孰賤哉。

人家富貴兩字。暫時之榮寵耳。所恃以長子孫者。畢竟是耕讀兩字。子弟有二三千金之產。方能城居。何則。二三千金之產。豐年有百餘金之入。自薪炭蔬菜雞豚魚蝦醢醢之屬。親戚人情應酬宴會之事。種種皆取辦于錢。豐年則穀賤。歉年穀亦不昂。僅可支吾。或能不致狼狽。若干金以下之業。則斷不宜城居矣。何則。居鄉則可以課耕數畝。其祖倍入。可以供八口。雞豚畜之于柵。蔬菜畜之于圃。魚蝦畜之于澤。薪炭取之于山。可以經旬屢月。不用數錢。且鄉居則親戚應酬寡。即偶有客至。亦不過具雞黍。女子力作。可以治紡績。衣布衣。策蹇驢。不必鮮華。凡此皆城居之所不能。且耕且讀。延師訓子。亦甚簡靜。囊無餘富。何致



為盜賊所窺。吾家湖上翁子弟甚得此趣。其所貽不厚。其所度日。皆較之城中數千金之產者。更為豐腴。且山水閒優游俯仰。復有自得之樂。而無窘迫之憂。人若不深察耳。果其讀書有成。策名仕宦。可以城居。則再入城居。一二世而後。宜于鄉居。則再往鄉居。鄉城耕讀。相為循環。可久可大。豈非吉祥善事哉。況且世家之產。在城不過取其額租。其山林湖泊之利。所遺甚多。此亦勢不能兼。若貧而鄉居。尚有遺利可收。不止田租而已。此又不可不知也。

予仕宦人也。止宜知仕宦之事。安能知農田之事。但余與四方英俊交且久。閱歷世故多。五十年來。見人家子弟成敗者不少。鬻田而窮。保田而裕。千人一轍。此予所以諄諄告口。為汝輩陳說也。先大夫戊子年析產。予得三百五十餘畝。後甲辰年再析。予一百五十餘畝。予戊戌年初析爨。始管莊事。是時吾里田產正當極賤之時。人問曰。汝父析產有銀乎。予對曰。但有田耳。問者索然。予時亦曰。田非不佳。但苦急切難售耳。及丁未後。予以公車有稱貸。遂賣甲辰年所析百五十畝。予四十以前。全不知田之可貴。故輕棄如此。後以予在仕宦。又不便向人贖取。至今始悟析產正妙在無銀。若初年寬裕。性既習慣。一二年後所分

既盡。悵悵然失其所恃矣。田之妙。正妙在急切難售。若容易售。則脫手甚輕矣。此予晚年之見。與少年時絕不相同者也。是皆予三折肱之言。其思之毋忽。

桐城張英敦復

聰訓齋語上

圃翁曰。聖賢領要之語。曰。人心惟危。道心惟微。危者嗜欲之心。如隄之束水。其潰甚易。一潰則不可復收也。微者理義之心。如帷之映鐙。若隱若現。見之難而晦之易也。人心至靈至動。不可過勞。亦不可過逸。惟讀書可以養之。每見堪輿家。平日用磁石養鍼。書卷乃養心第一妙物。閒適無事之人。鎮日不觀書。則起居出入。身心無所栖泊。耳目無所安頓。勢必心意顛倒。妄想生嗔。處逆境不樂。處順境亦不樂。每見人栖栖皇皇。覺舉動無不礙者。此必不讀書之人也。古人有言。掃地焚香。清福已具。其有福者。佐以讀書。其無福者。便生他想。旨哉斯言。予所深賞。且從來拂意之事。自不讀書者見之。似為我所獨遭。極其難堪。不知古人拂意之事。有百倍於此者。特不細心體驗耳。即如東坡先生。歿後遭逢高孝。文字始出名震千古。而當時之憂讒畏譏。困頓轉徙。潮惠之間。過蘇。跣足涉水。居近牛欄。是何如境界。又如白香山之無嗣。陸放翁之忍饑。皆載在書卷。彼

獨非千載聞人。而所遇皆如此。誠一平心靜觀。則人閒拂意之事。可以渙然冰釋。若不讀書。則但見我所遭甚苦。而無窮怨尤嗔忿之心。燒灼不甯。其苦為何如耶。且富盛之事。古人亦有之。炙手可熱。轉眼皆空。故讀書可以增長道心。為頤養第一事也。記誦纂集。期以爭長。應世則多苦。若涉覽。則何至勞心疲神。但當冷眼於閒中。窺破古人筋節處耳。予於白陸詩。皆細注其年月。知彼於何年引退。其衰健之蹟。皆可指。斯不夢夢耳。

圃翁曰。聖賢仙佛。皆無不樂之理。彼世之終身憂戚。忽忽不樂者。決然無道氣。無意趣之人。孔子曰。樂在其中。顏子不改其樂。孟子以不愧不忤為樂。論語開首說說樂。中庸言無入而不自得。程朱教尋孔顏樂處。皆是此意。若庸人多求多欲。不循理。不安命。多求而不得。則苦。多欲而不遂。則苦。不循理。則行多窒礙。而苦。不安命。則意多怨望。而苦。是以跼天踏地。行險傲倖。如衣敝絮。行荆棘中。安知有康衢坦塗之樂。惟聖賢仙佛。無世俗數者之病。是以常全樂體。香山字樂天。予竊慕之。因號曰樂園。聖賢仙佛之樂。予何敢望。竊欲營履道一邱一壑。做白傅之有叟在中。白鬚飄然。妻孥熙熙。雞犬閒閒之樂云耳。



圃翁曰。予擬一聯。將來懸草堂中。富貴貧賤。總難稱意。知足即為稱意。山水花竹。無恆主人。得閒便是主人。其語雖俚。卻有至理。天下佳山勝水。名花美箭。無限大約富貴人。役于名利。貧賤人。役于饑寒。總無閒情。及此。惟付之浩歎耳。

圃翁曰。唐詩如綴如錦。質厚而體重。文麗而絲密。溫醞爾雅。朝堂之所服也。宋詩如紗如葛。輕疎纖朗。便娟適體。田野之所服也。中年作詩。斷當宗唐律。若老年吟咏適意。闌入於宋。勢所必至。立意學宋。將來益流而不可返矣。五律斷無勝於唐人者。如王孟五言兩句。便成一幅畫。今試作五字。其寫難言之景。盡難狀之情。高妙自然。起結超遠。能如唐人否。蘇詩五律不多見。陸詩五律太率。非其所長。參唐宋人氣味。當於五律見之。

圃翁曰。昌黎聽穎師琴詩有云。呢呢兒女語。恩怨相爾汝。忽然勢軒昂。猛士赴戰場。又云。失勢一落千丈強。歐陽公以為琵琶詩。信然。予細味琴音。如微風入深松。寒泉滴幽澗。靜永古澹。其上下十三徽。出入一絃至七絃。皆有次第。大約由緩而急。由大而細。極於和平。冲夷為主。安有呢呢兒女。忽變為金戈鐵馬之聲。常建琴詩。江上調玉琴。一絃清一心。泠泠七絃遍。萬木沈秋陰。能令江月白。

又令江水深。始知枯桐枝。可以徹黃金。真可謂字字入妙。得琴之三昧者。味此則與昌黎之言迥別矣。古來士大夫學琴。類不能學多操。白香山止秋思一曲。范文正公止履霜一曲。高人撫絃動操。自有夷曠沖澹之趣。不在多也。古人製琴一曲。調適宮商。但傳指法。後人強被以語言文字。失之遠矣。甚至俗譜用大學及歸去來辭赤壁賦。強配七絃。一字予以一音。且有以山歌小曲溷之者。其為唐突古樂甚矣。宜為雅人之所深戒也。大抵琴音以古澹為宗。非在悅耳。心境微有不清。指下便爾荆棘。清風朗月之時。心無機事。曠然天真。時鼓一曲。不躁不懶。則緩急輕重合宜。自然正音出於腕下。清興超于物表。放翁詩曰。琴到無人聽處工。未深領斯妙者。自然聞古樂而欲卧。未足深論也。

圃翁曰。古人以眠食二者為養生之要務。臟腑腸胃。常令寬舒有餘地。則真氣得以流行。而疾病少。吾鄉吳友季善醫。每赤日寒風。行長安道上不倦。人問之曰。予從不飽食。病安得入。此食忌過飽之明徵也。燔炙熬煎。香甘肥膩之物。最悅口而不宜於腸胃。彼肥膩易於黏滯。積久則腹痛氣塞。寒暑偶侵。則疾作矣。放翁詩云。情盼作妖狐。未慘肥甘藏毒鴆。猶輕此老知攝生哉。炊飯極軟熟。雞

肉之類只澹煮菜羹清芬鮮潔沃之食只八分飽後飲六安苦茗一杯若勞頓  
饑餓歸先飲醕膠一二杯以開胃胃陶詩云濁醕解飢饑蓋藉之以開胃氣也  
如此焉有不益人者乎且食忌多只一席之間遍食水陸濃澹雜進自然損脾  
予謂或雞魚鳧狔之類只一二種飽食良為有益此未嘗聞之古昔而以予意  
揣當如此安寢乃人生最樂古人有言不覓仙方覓睡方冬夜以二鼓為度暑  
月以一更為度每笑人長夜酣飲不休謂之消夜夫人終日勞勞夜則宴息是  
極有味何以消遣為冬夏皆當以日出而起於夏尤宜天地清旭之氣最為爽  
神失之甚為可惜予山居頗閒暑月日出則起收水草清香之味蓮方斂而未  
開竹含露而猶滴可謂至快日長漏永不妨午睡數刻焚香垂幙淨展桃屋睡  
足而起神清氣爽真不啻天際真人況居家最宜早起倘日高客至僮則垢面  
婢則蓬頭庭除未埽竈突猶寒大非雅事昔何文端公居京師同年詣之日晏  
未起久之方出客問曰尊夫人亦未起耶答曰然客曰日高如此內外家長皆  
未起一家奴僕其為奸盜詐偽何所不至耶公瞿然自此至老不晏起此太守  
公親為予言者

圃翁曰。山色朝暮之變。無如春深秋晚。四月則有新綠。其淺深濃淡。早晚便不同。九月則有紅葉。其頽黃茜紫。或映朝陽。或迴夕照。或當風而吟。或帶霜而殷。皆可謂佳勝之極。其他則煙嵐雨岫。雲峰霞嶺。變幻頃刻。孰謂看山有厭倦時耶。放翁詩云。遊山如讀書。淺深在所得。故同一登臨。視其人之識解學問。以為高下苦樂。不可得而強也。予每日治裝入龍眠。家人相謂。山色總是如此。何用日日相對。此真淺之乎。言看山者。

圃翁曰。人家僮僕。最不宜多畜。但有得力二三人。訓諭有方。使令得宜。未嘗不得兼人之用。太多則彼此相謔。恩養必不能周。教訓亦不能及。反不得其力。且此輩當道家盛。則倚勢作非。招尤結怨。家道替。則飛揚跋扈。反脣賣主。皆勢所必至。予欲令家僕皆各治生業。可省遊手遊食之弊。不至於充食為非也。且僮僕甚無取乎黠慧者。吾輩居家居官。皆簡靜守理。不為閭昧之事。至衙門政務。皆自料理。不煩幹僕。巧權門之應對。為遠道之輸將。打點機密。奔走勢利。所用者不過趨蹌灑掃。負重徒步之事耳。焉用聰明才智為哉。至於山中。耕田鋤圃之僕。乃可為寶。其人無奢望。無機智。不為主人歛怨。彼縱不遵約束。不過懶惰。



愚蠢之小過不必加意防閒豈不為清閒之一助哉

圃翁曰昔人論致壽之道有四曰慈曰儉曰和曰靜人能慈心於物不為一切害人之事即一言有損於人亦不輕發推之戒殺生以惜物命慎翦伐以養天和無論冥報不爽即胸中一段吉祥愷悌之氣自然災沴不干而可以長齡矣人生享福皆有分數惜福之人福嘗有餘暴殄之人易至罄竭故老氏以儉為寶不止財用當儉而已一切事常思節省之義方有餘地儉於飲食可以養脾胃儉於嗜慾可以聚精神儉於言語可以養氣息非儉於交遊可以擇友寡過儉於疇酢可以養身息勞儉於夜坐可以安神舒體儉於飲酒可以清心養德儉於思慮可以蠲煩去擾凡事省得一分即受一分之益大約天下之事萬不得已者不過十之一二初見以為不可已細算之亦非萬不可已如此逐漸省去但日見事之少白香山詩云我有一言君記取世閒自取苦人多今試問勞擾煩苦之人此事亦儘可已果屬萬不可已者乎當必恍然自失矣人常和悅則心氣沖而五臟安昔人所謂養歡喜神真定梁公每語人日間辦理公事每晚家居必尋可喜笑之事與客縱談掀髯大笑以發舒一日勞頓鬱結之氣此

真得養心要訣。何文端公時曾有鄉人過百歲。公扣其術。答曰。予鄉村人無所知。但一生只是喜歡。從不知憂惱。噫。此豈名利中人所能哉。傳曰。仁者靜。又曰。知者動。每見氣躁之人。舉動輕佻。多不得壽。古人謂硯以世計。墨以時計。筆以日計。動靜之分也。靜之義有二。一則身不過勞。一則心不輕動。凡遇一切勞頓。憂惶喜樂恐懼之事。外則順以應之。此心凝然不動。如澄潭。如古井。則志一動。氣外閒之紛擾。皆退聽矣。此四者於養生之理。極為切實。較之服藥引導。奚啻萬倍哉。若服藥。則物性易偏。或多燥滯。引導吐納。則易至作輟。必以四者為根本。不可舍本而務末也。道德經五千言。其要旨不外於此。銘之座右。時時體察。當有裨益耳。

圃翁曰。人生不能無所適。以寄其意。予無嗜好。惟嗜好看山種樹。昔王右軍亦云。吾篤嗜種果。此中有至樂存焉。手種之樹。開一花。結一實。玩之偏愛。食之益甘。此亦人情也。陽和里五畝園。雖不廣。倘所謂有水一池。有竹千竿者耶。花十有二種。每種得十餘本。循環玩賞。可以終老。城中地隘。不能多植。然在居室之西數武。花晨月夕。不須肩輿策蹇。自朝至夜。可以酣賞飽看。一花一草。自始開。

至零落無不窮極其趣則一株可抵十株一畝可敵十畝山中嚮營賜金園今  
構芙蓉島皆以田為本於隙地疏池種樹不廢耕耘閱耕是人生最樂古人所  
云躬耕亦止是課僕督農亦不在沾體塗足也

圃翁曰山居宜小樓可以收攬羣峰眾壑之勢竹杪松梢更有奇趣予擬于芙  
蓉島南向構一小樓題曰千崖萬壑之樓大溪環抱羣岫聳峙可謂快矣築小  
齋三楹曰佳夢軒夫人生如夢信矣使夕夢至此豈不以為佳甚耶陸放翁夢  
至仙館得詩云長廊下瞰碧蓮沼小閣正對青蘿峰便以為極勝之景予此中  
頗有之可不謂之佳夢耶香山詩云多道人生都是夢夢中歡樂亦勝愁人既  
在夢中則宜稅駕咀嚼其夢而不當為夢幻泡影之嗟予固將以此為睡鄉而  
不復從邯鄲道上向道人借黃梁枕也

圃翁曰人生於珍異之物決不可好昔端恪公言士人於一研一琴當得佳者  
研可適用琴能發音其他皆屬無益良然磁器最不當好甕佳者必脆薄一醜  
值數十金僮僕捧持易致不謹過于矜束反致失手朋客歡譏亦鮮樂趣此物  
在席賓主皆有戒心何適意之有甕取厚而中等者不至太粗縱有傾跌亦不

甚惜。斯為得中之道也。名畫法書。及海內有名玩器。皆不可畜。從來賈禍招尤。可為龜鑑。購之不啻千金。貨之不值一文。且從來真實難辨。變幻奇於鬼神。裝潢易於竊換。一軸得善價。繼至者遂不旋踵。以偽為真。以真為偽。互相訛笑。止可供噴飯。昔真定梁公有字畫之好。竭生平之力收之。捐館後為勢家所求索。殆盡。然雖與以佳者。輒謂非是。疑其藏匿。其子孫深受斯累。此可為明鑑者也。圓翁曰。天體至圓。故生其中者。無一不肖其體。懸象之大者。莫如日月。以至人之耳目手足。物之毛羽。樹之花實。土得雨而成丸。水得雨而成泡。凡天地自然而生皆圓。其方者皆人力所為。蓋稟天之性者。無一不具天之體。萬事做到極精妙處。無有不圓者。聖人之德。古今之至文法帖。以至一藝一術。必極圓而後登峰造極。裕親王曾暢言其旨。適與予論相合。偶論及科場文。想必到圓處始佳。即飲食做到精美處。到口也是圓底。余嘗觀四時之旋運。寒暑之循環。生息之相因。無非圓轉。人之一身。與天時相應。大約三四十以前。是夏至前。凡事漸長。三四十以後。是夏至後。凡事漸衰。中間無一刻停留。中間盛衰闕頭。無一定時候。大概在三四十之間。觀於鬚髮可見。其衰緩者其壽多。其衰急者其壽寡。



人身不能不衰。先從上而下者多壽。故古人以早脫頂為壽徵。先從下而上者多不壽。故鬚髮如故而脚軟者難治。凡人家道亦然。盛衰增減。決無中立之理。如一樹之花。開到極盛。便是搖落之期。多方保護。順其自然。猶恐其速開。況敢以火氣催逼之乎。京師溫室之花。能移牡丹各色。桃於正月。然花不盡其分量。一開之後。根幹輒萎。此造化之機。不可不察也。嘗觀草木之性。亦隨天地為圓。轉梅以深冬為春。桃李以春為春。榴荷以夏為春。菊桂芙蓉以秋為春。觀其枝節含苞之處。渾然天地造化之理。故曰復其見天地之心乎。

圃翁曰。人往往於古人片紙隻字。珍如拱璧。其好之者索價千金。觀其落筆神彩。洵可寶矣。然自予觀之。此特一時筆墨之趣所寄耳。若古人終身精神識見。盡在其文集中。乃其嘔心劇肺而出之者。如白香山蘇長公之詩數千首。陸放翁之詩八十五卷。其人自少至老。仕宦之所歷。遊跡之所至。悲喜之情。怫愉之色。以至言貌聲氣。飲食起居。交遊醜酢。無一不寓其中。較之偶爾落筆。其可寶不且萬倍哉。予怪世人於古人詩文集不知愛。而寶其片紙隻字為大惑也。余昔在龍眠。苦於無客為伴。日則步屨於空潭碧澗。長松茂竹之側。夕則掩關讀

蘇陸詩以二鼓為度。燒燭焚香煮茶。延兩君子於坐。與之相對。如見其容貌鬚眉然。詩云。架頭蘇陸有遺書。特地攜來共索居。日與兩君同卧起。人間何客得勝渠。良非解嘲語也。

圃翁曰。予嘗言享山林之樂者。必具四者。而後能長享其樂。實有其樂。是以古今來不易觀也。四者維何。曰道德。曰文章。曰經濟。曰福命。所謂道德者。性情不乖戾。不谿刻。不褊狹。不暴躁。不移情于紛華。不生嗔于冷暝。居家則肅。雖簡靜。足以見信於妻孥。居鄉則厚重謙和。足以取重於鄰里。居身則恬澹寡營。足以不愧於衾影。無忤於人。無羨於世。無爭於人。無憾於己。然後天地容其隱逸。鬼神許其安享。無心意顛倒之病。無取舍轉徙之煩。此非道德而何哉。佳山勝水。茂林修竹。全恃我之性情識見取之。不然。一見而悅。數見而厭。心生矣。或吟詠古人之篇章。或抒寫性靈之所見。一字一句。便可千秋相契。無言亦成妙諦。古人所謂行到水窮處。坐看雲起時。又云登東臯以舒嘯。臨清流而賦詩。斷非不解筆墨人所能領略。此非文章而何哉。夫茅亭草舍。皆有經綸。菜蘢瓜畦。具見規畫。一草一木。其布置亦有法度。澹泊而可免饑寒。徒步而不致委頓。良辰美

景而匏樽不空。歲時伏臘而雞豚可辦。分花乞竹不須多費。而自有雅人深致。疏池結籬不煩華侈。而皆能天然入畫。此非經濟而何哉。從來愛閒之人類不得閒。得閒之人類不愛閒。公卿將相時至則為之。獨是山林清福為造物之所深吝。試觀宇宙閒幾人。解脫書卷之中亦不多得。置身在窮達毀譽之外。名利之所不能奔走。世味之所不能縛束。室有菜妻而無交謫之言。田有伏臘而無乞米之苦。白香山所謂事了心了。此非福命而何哉。四者有一不具。不足以享山林清福。故舉世聰明才智之士。非無一知半見。略知山林趣味。而究竟不能身入其中。職此之故也。

圃翁曰。予於歸田之後。誓不著緞。不食人葷。夫古人至貴。猶服三澣之衣。緞之為物。不可洗。不可染。而其價六七倍於湖州縐。紬與絲綢。佳者三四錢一尺。比於一疋布之價。初時華麗可觀。一沾灰油。便色改而不可澣洗。況予素性疎忽。於衣服不能整齊。最不爱華麗之服。歸田後。惟著絨褐山繭文布湖紬。期於適體養性。冬則羔裘。夏則蕉葛。一切珍裘細縠。悉屏棄之。不使外物妨吾坐起也。老年奔走應事務。日服人參一二錢。細思吾鄉米價一石不過四錢。今日服參

價如之或倍之。是一人而兼百餘人餬口之具。忍孰甚焉。侈孰甚焉。夫藥性原以治病。不得已而取效於旦夕。用是補續血氣。乃竟以為日用尋常之物。可乎哉。無論物力不及。即及亦不當為。予故深以為戒。倘得邀恩遂初。此二事斷然不渝吾言也。

圃翁曰。古人美王司徒之德。曰門無雜賓。此最有味。大約門下奔走之客。有損無益。主人以清正高簡安靜為美。於彼何利焉。可以啖之以利。可以動之以名。可以怵之以利害。則欣動其主人。主人不可動。則誘其子弟。誘其僮僕。外探無稽之言。以熒惑其視聽。內洩機密之語。以誇示其交遊。甚且以偽為真。將無作有。以傲倖其語之或驗。則從中而取利焉。或居要津之位。或處權勢之地。尤當遠之益遠也。又有挾術技以遊者。彼皆藉一藝以售其身。漸與仕宦相親密。而遂以乘機邁會。其本念決不在專售其技也。挾術以遊者。往往如此。故此輩之樸訥迂鈍者。猶當慎其晉接。若狡黠便佞。好生事端。踪跡詭秘者。以不識其人。不知其姓名為善。勿曰我持正。彼安能惑我。我明察。彼不能蔽我。恐久之自墮其術中而不能出也。



圃翁曰。予性不愛觀劇。在京師一席之費。動踰數十金。徒有應酬之勞。而無酣適之趣。不若以其費濟困賤。急為人我利溥也。予六旬之期。老妻禮佛時。忽念誕日。例當設梨園宴親友。吾家既不為此。胡不將此費製絲衣袴百領。以施道路饑寒之人乎。次日為余言。笑而許之。予意欲歸里時。做陸梭山居家之法。以一歲之費。分為十二股。一月用一分。每日於食用節省。月晦之日。則總一月之所餘。別作一封。以應貧寒之急。能多作好事一兩件。其樂逾于日享大烹之奉多矣。但在勉力而行之。

圃翁曰。移樹之法。江南以驚蟄前後半月為宜。大約從土掘出之根。最畏春風。故須用土裹密。用草包之。不宜見風。甚不宜於隔宿。所以吳門建業來賣花者。行千里。經一月。而猶活。乃用金汁土密護其根。不使露風之故。近地移植。反不活者。不知此理之故也。其新生細白根。係生氣所託。尤不當損。人但知深根固蒂。不知亦不宜太深。種植書謂加舊跡一指。若太深。則泥水傷樹皮。斷然不茂矣。凡樹大約花時移。則彼精脈在枝葉。易活。於桂尤甚。花已有蓓蕾。移之多開。然此最泄氣。故移樹而花盛開者多不活。惟葉茂則其樹必活矣。牡丹移在秋。

當春宜盡去其花。若少愛惜則其氣泄。樹即活亦不茂。數年後多自萎。樹之作花甚不易。氣泄則本傷。古人云。再實之木其根必傷。人之於文章功名也亦然。不可不審也。

圃翁曰。予少年嗜六安茶。中年飲武夷而甘。後乃知芥茶之妙。此三種可以終老。其他不必問矣。芥茶如名士。武夷如高士。六安如野士。皆可為歲寒之交。六安尤養脾。食飽最宜。但鄙性好多飲茶。終日不離甌椀。為宜節約耳。

圃翁曰。論語云。不知命無以為君子。考亭註。不知命。則見利必趨。見害必避。而無以為君子。予少奉教於姚端恪公。服膺斯語。每遇疑難躊躇之事。輒依據此言。稍有把握。古人言。居易以俟命。又言行法以俟命。人生禍福榮辱得喪。自有定命數。確不可移。審此則利可趨。而有不必趨之利。害宜避。而有不能避之害。利害之見既除。而為君子之道始出。此為字其有力。既知利害有一定。則落得做好人也。權勢之人。豈必與之相抗。以取害。到難於相從處。亦要內不失己。果謙和以謝之。宛轉以避之。彼亦未必決能禍我。此亦命數宜然。又安知委曲從彼之禍。不更烈於此也。使我為州縣官。決不用官銀媚上官。安知用官銀之禍。

不甚於上官之失權也。昔者米脂令蕭君掘李賊之祖墳。賊破京師。後獲蕭君置軍中。欲甘心焉。挾至山西。以二十人守之。蕭君夜遁。後復為州守。自著虎吻。餘生記其事。李賊殺人數十萬。究不能殺一蕭君。生死有命。寧不信然耶。予官京師日久。每見人之數。應為此官。而其時本無此一缺。有人焉。竭力經營。幹辦停當。而此人無端值之。或反為此人之所不欲。且滋詬詈。如此者不一而足。此亦舉世之人共知之。而當局則往往迷而不悟。其中之求速反遲。求得反失。彼人為此人而謀。此事因彼事而壞。顛倒錯亂。不可究詰。人能將耳目聞見之事。平心體察。亦可消許多妄念也。

圃翁曰。人生適意之事有三。曰貴曰富曰多子孫。然是三者。善處之則為福。不善處之則足為累。至為累而求所謂福者。不可見矣。何則。高位者。責備之地。忌嫉之門。怨尤之府。利害之關。憂患之窟。勞苦之藪。謗訕之的。攻擊之場。古之智人。往往望而卻步。況有榮則必有辱。有得則必有失。有進則必有退。有親則必有疎。若但計邱山之得。而不容銖兩之失。天下安有此理。但己身無大謫過。而外來者平澹視之。此處貴之道也。佛家以貨財為五家公共之物。一曰國家。二

曰官吏。三曰水火。四曰盜賊。五曰不肖子孫。夫人厚積則必經營布置。生息防守。其勞不可勝言。則必有親戚之請求。貧窮之怨望。僮僕之奸騙。大而盜賊之劫取。小而穿窬之鼠竊。經商之虧折。行路之失脫。田禾之災傷。攘奪之爭訟。子弟之浪費。種種之苦。貧者不知。惟富厚者兼而有之。人能知富之為累。則取之當廉。而不必厚積以招怨。視之當淡。而不必深伎以累心。思我既有此財貨。彼貧窮者不取我而取誰。不怨我而怨誰。平心息忿。庶不為外物所累。儉於居身。而裕於待物。薄於取利。而謹於益藏。此處富之道也。至子孫之累尤多矣。少小則有疾病之慮。稍長則有功名之慮。浮著不善治家之慮。納交匪類之慮。一離膝下。則有道路寒暑饑渴之慮。以至由子而孫。展轉無窮。更無底止。夫年壽既高。子息蕃衍。焉能保其無疾病痛楚之事。賢愚不齊。升沈各異。聚散無恆。憂樂自別。但當教之孝友。教之謙讓。教之立品。教之讀書。教之擇友。教之養身。教之儉用。教之作家。其成敗利鈍。父母不必過為縈心。聚散苦樂。父母不必憂念成疾。但視已無甚刻薄。後人當無悖出之患。已無大偏私。後人自無攘奪之患。已無甚貪婪。後人自當無蕩盡之患。至於天行之數。稟賦之愚。有才而不遇。無因



而致疾。延良醫。慎調治。延良師。謹教訓。父母之責盡矣。父母之心盡矣。此處多子孫之道也。予每見世人處好境而鬱鬱不快。動多悔吝憂戚。必皆此三者之故。由不明斯理。是以心褊見隘。未食其報。先受其苦。能靜體吾言。於擾擾之中。存榮榮之亮。豈非熱火坑中一服清涼散。苦海波中一架八寶筏哉。

圃翁曰。予自四十六七以來。講求安心之法。凡喜怒哀樂。勞苦恐懼之事。只以五官四肢應之。中間有方寸之地。常時空空洞洞。朗朗惺惺。決不令之入。所以此地常覺寬綽潔淨。予製為一城。將城門緊閉。時加防守。惟恐此數者闖入。亦有時賊勢甚銳。城門稍疎。彼閒或闖入。即時覺察。便驅之出城外。而牢閉城門。今此地仍寬綽潔淨。十年來漸覺闖入之時少。不甚用力驅逐。然城外不免紛擾。主人居其中。尚無渾忘天真之樂。倘得歸田。遂初。見山時多。見人時少。空潭碧落。或庶幾矣。

圃翁曰。予之立訓。更無多言。只有四語。讀書者不賤。守田者不饑。積德者不傾。擇交者不敗。嘗將四語律身訓子。亦不用煩言。夥說矣。雖至寒苦之人。但能讀書為文。必使人欽敬。不敢忽視。其人德性亦必溫和。行事決不顛倒。不在功名。

之得失。遇合之遲速也。守田之說。詳於恆產瑣言。積德之說。六經語孟。諸史百家。無非闡發此義。不須贅說。擇交之說。予目擊身歷。最為深切。此輩毒人。如鴆之入口。蛇之螫膚。斷斷不易。決無解救之說。尤四者之綱領也。余言無奇。只布帛菽粟。可衣可食。但在體驗親切耳。

此老天性極厚。見識極高。而又深於閱歷。不惜溷心苦口。指點迷津。細味之。極平澹。卻極精奇。金鍼刺繡。巨劍摩天。可備學庸外傳。吾弟少穆。觀譽持贈此書。拜登不翅拱璧之賜。尤願遍頒海內。俾人人得服此清涼一散。少受人間苦惱。則功德亦無量矣。

生春草堂主人跋

聰訓齋語下

圃翁曰。人生必厚重沈靜。而後為載福之器。王謝子弟。席豐履厚。田廬僕役。無一不具。且為人所敬禮。無有輕忽之者。視寒畯之士。終年授讀。遠離家室。脣燥吻枯。僅博束脩數金。仰事俯育。咸取諸此。應試則徒步而往。風雨泥淖。一步三歎。凡此情形。皆汝輩所習見。仕宦子弟。則乘輿驅肥。即僮僕亦無徒行者。豈非福耶。乃與寒士一體怨天尤人。爭較錙銖得失。寧非過耶。古人云。予之齒者。去其角。與之翼者。兩其足。天道造物。必無兩全。汝輩既享席豐履厚之福。又思事。事周全。揆之天道。豈不誠難。惟有敦厚謙謹。慎言守禮。不可與寒士同。一般感慨歎歎。放言高論。怨天尤人。庶不為造物鬼神所呵責也。況父祖經營多年。有田廬別業。身則勞於王事。不獲安享。為子孫者。生而受其福。乃又不思安享。而妄想妄行。寧不大可惜耶。思盡人子之責。報父祖之恩。致鄉里之譽。貽後人之澤。唯有四事。一曰立品。二曰讀書。三曰養身。四曰儉用。世家子弟。原是貴重。更

得精金美玉之品。言思可道。行思可法。不驕盈。不詐偽。不刻薄。不輕佻。則人之  
欽重。較三公而更貴。

祖父贈光祿公恂所府君。每聞鄉人言其厚德。邑人仰之如祥麟威鳳。方伯公  
己酉登科。邑人榮之。贈以聯曰。張不張威。願秉文文名天下。盛有盛德。期可藩  
藩屏王家。至今桑梓以為美談。父親贈光祿公拙菴府君。予逮事三十年。生平  
無疾言遽色。居身節儉。待人寬厚。為介弟。未嘗以一事一言干謁州縣。生平未  
嘗呈送一人。見鄉里煦煦以和。所行隱德甚多。從不向人索逋欠。以故三世皆  
祀於鄉賢。請主入廟之日。里人莫不欣喜。道盛德之報。是亦何負於人哉。予行  
年六十有一。生平未嘗送一人於捕廳。令其呵譴之。更勿言答責。願吾子孫終  
守此戒。勿犯也。不足則斷不可借債。有餘則斷不可放債。權子母起家。惟至寒  
之士稍可。若富貴人家為之。斂怨養姦。得罪招尤。莫此為甚。鄉里閒荷擔負。販  
及傭工小人。切不可取其便宜。此種人所爭不過數文。我輩視之甚輕。而彼之  
含怨甚重。每有愚人。見省得一文。以為得計。而不知此種人心忿。口碑所損實  
大也。待下我一等之人。言語辭氣。最為要緊。此事甚不費錢。然彼人受之。同於



實惠。只在精神照料得來。不可憚煩。易所謂勞謙是也。予深知此理。然苦於性情疎懶。憚於趨承。故我惟思退處山澤。不見要人。庶少斯過。終日懍懍耳。讀書固所以取科名。繼家聲。然亦使人敬重。今見貧賤之士。果胸中淹博。筆下氤氳。則自然進退安雅。言談有味。即使迂腐不通方。亦可以教學授徒。為人師表。至舉業乃朝廷取士之具。三年開場大比。專視此為優劣。人若舉業高華秀美。則人不敢輕視。每見仕宦顯赫之家。其老者或退或故。而其家索然者。其後無讀書之人也。其家鬱然者。其後有讀書之人也。山有猛獸。則藜藿為之不採。家有子弟。則強暴為之改容。豈止掇青紫榮宗祊而已哉。予嘗有言曰。讀書者不賤。不專為場屋進退而言也。父母之愛子弟。一望其康甯。第二冀其成名。第三願其保家。語曰。父母惟其疾之憂。夫子以此答武伯之問孝。至哉斯言。安其身以安父母之心。孝莫大焉。養身之道。一在謹嗜慾。一在慎飲食。一在慎忿怒。一在慎寒暑。一在慎思索。一在慎煩勞。有一於此。足以致病。以貽父母之憂。安得不時時謹懍也。吾貽子孫。不過瘠田數處耳。且甚荒蕪不治。水旱多虞。歲入之數。僅足以免饑寒畜妻子而已。一件兒戲事做不得。一件高興事做不得。生平最

喜陸梭山過日治家之法。以為先得我心。誠做而行之。庶幾無鬻產蕩家之患。予有言曰。守田者不饑。此二語足以長世。不在多言。凡人少年德性不定。每見人厭之曰慳。笑之曰嗇。謂之曰儉。輒面發熱。不知此最是美名。人肯以此誦之。亦最是美事。不必避諱。人生豪俠周密之名。至不易副。事事應之。一事不應。遂生嫌怨。人人周之。一人不周。便存形迹。若平生儉嗇。見諒於人。省無窮物力。少無窮嫌怨。不亦至便乎。四者立身行己之道。己有崕岬。而其關鍵切要。則又在於擇友。人生二十內外。漸遠於師保之嚴。未躋於成人之列。此時知識大開。性情未定。父師之訓不能入。即妻子之言亦不聽。惟朋友之言。甘如醴而芳若蘭。脫有一淫朋匪友。闖入其側。朝夕浸灌。鮮有不為其所移者。從前四事。遂蕩然。而莫可收拾矣。此予幼年時知之最切。今親戚中倘有此等之人。則踪跡常令踈遠。不必親密。若朋友則直以不識其顏面。不知其姓名為善。比之毒草啞泉。更當速避。芸圃有詩云。於今道上揶揄鬼。原是尊前媼媚人。蓋痛乎其言之矣。擇友何以知其賢否。亦即前四件能行者為良友。不能行者為非良友。予暑中退休。稍有暇晷。遂舉胸中所欲言者。筆之於此。語雖無文。然三十餘年涉歷仕

塗多逢險阻。人情物理知之頗熟。言之較親。後人勿以予言為迂而遠於事情也。

楷書如坐如立。行書如行。草書如奔。人之形貌雖不同。然未有傾斜跛側為佳者。故作楷書。以端莊嚴肅為尚。然須去矜束拘迫之態。而有雍容和愉之象。斯晉書之所獨擅也。分行布白。取乎勻淨。然亦以自然為妙。樂毅論如端人雅士。黃庭經如碧落仙人。東方朔像贊如古賢前哲。曹娥碑有孝女婉順之容。洛神賦有淑姿纖麗之態。蓋各象其文以為體。要有骨有肉。一行之閒。自相顧盼。如樹木之枝葉扶疎。而彼此相讓。如流水之淪漪雜見。而先後相承。未有偏斜傾側。各不相顧。絕無神彩。步伍連絡映帶。而可稱佳書者。細玩蘭亭。委蛇生動。千古如新。董文敏書大小疏密。於尋行數墨之際。最有趣致。學者當於此參之。

法昭禪師偈云。同氣連枝各自榮。些些言語莫傷情。一回相見一回老。能得幾時為弟兄。詞意藹然。足以啟人友于之愛。然予嘗謂人倫有五。而兄弟相處之日最長。君臣之遇合。朋友之會聚。久速固難必也。父之生子。妻之配夫。其早者皆以二十歲為率。惟兄弟或一二年。或三四年。相繼而生。自竹馬遊戲。以至給

背鶴髮。其相與周旋。多者至七八十年之久。若恩意淡洽。猜閒不生。其樂豈有涯哉。近時有周益公。以太傅退休。其兄秉成先生。以將作監丞退休。年皆八十。詩酒相娛者終其身。章泉趙昌甫兄弟。亦俱隱於玉山之下。蒼顏華髮。相從於泉石之間。皆年近九十。真人閒至樂之事。亦人閒希有之事也。

論語文字。如化工肖物。簡古渾淪。而盡事情。平易涵蘊。而不費辭。子尚書毛詩之外。別為一種。大學中庸之文。極闕闕精微。而包羅萬有。孟子則雄奇跌宕。變幻洋溢。秦漢以來。無有能此四種文字者。特以儒生習讀而不察。遂不知其章法。字法之妙也。當細心玩味之。

古人讀文選。而悟養生之理。得力於兩句。曰石蘊玉而山輝。水涵珠而川媚。此真是至言。嘗見蘭蕙芍藥之蒂閒。必有露珠一點。若此一點。為蟻蟲所食。則花萎矣。又見筍初出。當曉則必有露珠數影在其末。日出則露復斂而歸根。夕則復上。田閒有詩云。夕看露顆上梢行是也。若侵曉入園。筍上無露珠。則不成竹。遂取而食之。穠上亦有露。夕現而朝斂。人之元氣。全在于此。故文選二語。不可不時時體察。得訣固不在多也。



世人只因不知命。不安命。生出許多勞擾。聖賢明明說與曰。君子居易以俟命。又曰。君子行法以俟命。又曰。修身以俟之。不知命。無以為君子。因知之真。而後俟之安也。予虛世故頗多。認此一字頗確。曾與韓慕廬宿齋天壇。深夜劇談。慕廬談當年鄉會考時。鄉試則有得售之想。場中頗著意。至會試殿試。則全無心而得會狀。會試場大風吹卷。欲飛號中人。皆取石堅押。韓獨無意。祝曰。若當中則自不吹去。亦竟無恙。故其會試殿試文。皆遊行自在。無斧鑿痕。予謂慕廬足下兩掇魏科。當是何如勇猛。以此言告人。人決不信。余獨信之。何以故。予自諭德後。即無意仕進。不止無競進之心。且時時求退不已。乃由講讀學士躋學士。登亞卿正卿。皆華臚清貴之官。自傍人觀之。不知是何如勇猛精進。以予自審。則知慕廬之非妄矣。慕廬亦可以已事推之。而知予之非誑也。願與世人共知之。

予生平嗜卉木。遂成奇癖。亦自覺可哂。細思天下歌舞聲伎。古玩書畫。禽鳥博奕之屬。皆多費而耗物力。惹氣而多後患。不可以訓子孫。惟山水花木。差可自娛。而非人之所爭。草木日有生意。而妙於無知。損許多愛憎煩惱。京師難於樹

植艱於曠土。書閣中置盆花數種。滋培收護。頗費心力。然亦可少供耳目之玩。琴薦書幌。牀頭十笏之地。無非落花填塞。亦一佳話也。

古人佩玉。朝夕不離。義取溫潤堅栗。君子無故不撤琴瑟。義取和平溫厚。故質性爽直者。恐近高亢。益當深體此意。以自箴砭。不可任其一往之性也。

人生以擇友為第一事。自就塾以後。有室有家。漸遠父母之教。初離師保之嚴。此時乍得友朋。投契締交。其言甘如蘭芷。甚至父母兄弟妻子之言。皆不聽受。惟朋友之言是信。一有匪人廁於閒。德性未定。識見未純。斷未有不為其所移者。余見此屢矣。至仕宦之子弟尤甚。一入其彀中。迷而不悟。脫有尊長誠諭。反生嫌隙。益滋乖張。故余家訓有云。保家莫如擇友。蓋痛心疾首其言之也。汝輩但於至戚中。觀其德性謹厚好讀書者。交友兩三人足矣。況內有兄弟。互相師友。亦不至岑寂。且以勢利言之。汝則溫飽。來交者豈能皆有文章道德之切劘。平居則有酒食之費。應酬之擾。一遇婚喪有無。則有資給稱貸之事。甚至有爭訟外侮。則又有關說救援之事。平昔既與之契密。臨事卻之。必生怨毒反唇。故余以為宜慎之於始也。況且嬉遊徵逐。耗精神而荒正業。廣言談而滋是非。種

種弊端。不可紀極。故特為痛切發揮之。昔人有戒。飯不嚼便嚙。路不看便走。話不想便說。事不思便做。洵為格言。予益之曰。友不擇便交。氣不忍便動。財不審便取。衣不慎便脫。

學字當專一。擇古人佳帖。或時人墨蹟。與己筆路相近者。專心學之。若朝更夕改。見異而遷。鮮有得成者。楷書如端坐。須莊嚴寬裕。而神彩自然掩映。若體格不勻淨。而遽講流動。失其本矣。汝小字可學樂毅論。前見所寫樂毅論。大有進步。今當一心臨做之。每日明窗淨几。筆精墨良。以白奏本紙臨四五百字。亦不須太多。但工夫不可間斷。紙畫烏絲格。古人最重分行布白。故以整齊勻淨為要。學字忌飛動草率。大小不勻。而妄言奇古磊落。終無進步矣。行書亦宜專心一家。趙松雪珮玉垂紳。丰神清貴。而其原本則出于聖教序蘭亭。猶見晉人風度。不可訾議之也。汝作聯字。亦頗有豐秀之致。今專學松雪。亦可望其有進。但不可任意變遷耳。

龍眠芙蓉谿。吾朝夕夢寐所在也。垂雲泝天然石壁。上倚青山。下臨流水。當為吾相度可亭之地。期于對石枕流。雙谿草堂前。引南北二澗為兩池。中一閘相

通一種蓮。一種魚。製扁舟容五六人。朱欄翠檻。蘭槳桂櫂。從芙蓉谿亭登舟。至  
艤舟亭登岸。襟帶吾廬。汝歸當謀疏鑿。闊處十二丈。窄處二三丈。但可以行舟。  
汝兄弟姪輪日督工。於九月杪從事。渠成以報吾堂。軒基址預以繩定之。以俟  
異日。臨河有大石。土人名為攏洞。此地相度亭子。下臨澄潭。四圍嶺岫。既曠然  
軒豁。亦窈然幽深。其旁當種梅柳以映帶之。亦此時事也。向來梅杏桃李之屬。  
種植者亦不少矣。使皆茂達。儘可自娛。此時澆溉修治。扶植去草為急。僕人紙  
上之樹日增。園中之樹日減。汝當為吾稽察之。樹不活與不種同。山中須三五  
日靜坐經理。晨入暮歸。不如其已也。可與兄弟姪言之。

辛巳春分日。予攜大郎二郎六郎出西直門。過高梁橋。沿溪水至法華寺。飯于  
僧舍。因至萬壽寺。時甫移華嚴鐘於後閣。尚未懸架。遂過天禧宮。看白松。蓋余  
最心賞古松。枝幹如凝雪。清響如飛濤。班剝離奇。扶疎詰曲。枝枝入畫。葉葉有  
聲。如對高人逸士。不敢褻玩。京師寺觀。此種為多。而時代久遠。則無過天禧宮  
者。共二十餘株。皆異態殊形。可謂巨觀矣。是行也。春寒初解。野色蒼茫。然已有  
融潤之氣。得小詩曰。緣谿來古寺。石堰舊河梁。冰泮波澄綠。風輕柳翹黃。苔痕



春已半。松影日初長。籃筍攜諸子。僧寮野菽香。

時文以多作為主。則工拙自知。才思自出。谿徑自熟。氣體自純。讀文不必多。擇其精純條暢。有氣局詞華者。多則百篇。少則六十篇。神明與之渾化。始為有益。若貪多務博。過眼輒忘。及至作時。則彼此不相涉。落筆仍是故吾。所以思常窒而不靈。詞常窘而不裕。意常枯而不潤。記誦勞神。中無所得。則不熟不化之病也。學者犯此弊最多。故能得力于簡。則極是要訣。古人言簡鍊以為揣摩。最是立言之妙。勿忽而不察也。

治家之道。謹肅為要。易經家人卦。義理極完備。其曰家人嗃嗃。悔厲吉。婦子嘻嘻。終吝。嗃嗃。近於煩瑣。然雖厲而終吉。嘻嘻流於縱軼。則始寬而終吝。余欲于居室自書一額。曰惟肅乃雍。常以自警。亦願吾子孫共守也。

人之居家立身。最不可好奇。一部中庸。本是極平澹。卻是極神奇。人能於倫常無缺。起居動作。治家節用。待人接物。事事合于矩度。無有乖張。便是聖賢路上人。豈不是至奇。若舉動怪異。言語詭激。明明坦易道理。卻自尋奇覓怪。守偏文過。以為不墜恆境。是窮奇禱杌之流。烏足以表異哉。布帛菽粟。千古至味。朝夕

不能離何獨至於立身制行而反之也。

與人相交一言一事皆須有益于人。便是善人。余偶以忌辰著朝服出門巷口見一人遙呼曰。今日是忌辰。余急易之。雖不識其人。而心感之。如此等事。在彼無絲毫之損。而于人為有益。每謂同一禽鳥也。聞鸞鳳之名則喜。聞鴝鵒之聲則惡。以鸞鳳能為人福。而鴝鵒能為人禍也。同一草木也。毒草則遠避之。參苓則共寶之。以毒草能鴆人。而參苓能益人也。人能處心積慮一言一動皆思益人。而痛戒損人。則人望之若鸞鳳。寶之如參苓。必為天地之所佑。鬼神之所服。而享有多福矣。此理之最易見者也。

凡讀書二十歲以前所讀之書。與二十歲以後所讀之書迥異。幼年知識未開。天真純固。所讀者雖久不溫習。偶爾提起。尚可數行成誦。若壯年所讀。經月則忘。必不能持久。故六經秦漢之文。詞語古奧。必須幼年讀。長壯後雖倍蓰其功。終屬影響。自八歲至二十歲。中間歲月無多。安可荒棄。或讀不急之書。此時時文固不可不讀。亦須擇典雅醇正。理純辭裕。可歷二三十年無弊者讀之。若朝華夕落。淺陋無識。詭僻失體。取悅一時者。安可以珠玉難換之歲月。而讀此無

益之文。何如誦得左國一兩篇。及東西漢典貴華腴之文數篇。為終身受用之寶乎。且更可異者。幼齡入學之時。其父師必令其讀詩書易左傳禮記兩漢八家文。及十八九作制義。應科舉時。便束之高閣。全不溫習。此何異衣中之珠。不知探取。而向塗人乞漿乎。且幼年之所以讀經書。本為壯年擴充才智。驅駕古人。使不寒儉。如畜錢待用者然。乃不知尋味其義蘊。而弁髦棄之。豈不大相刺謬乎。我願汝曹將平昔已讀經書。視之如拱壁。一月之內。必加溫習。古人之書。安可盡讀。但我所已讀者。決不可輕棄。得尺則尺。得寸則寸。毋貪多。毋貪名。但讀得一篇。必求可以背誦。然後思通其義蘊。而運用之於手腕之下。如此則才氣自然發越。若曾讀此書。而全不能舉其詞。謂之畫餅充饑。能舉其詞。而不能運用。謂之食物不化。二者其去枵腹無異。汝輩于此極宜猛省。

凡物之殊異者。必有光華發越於外。況文章為榮世之業。士子進身之具乎。非有光彩。安能動人。聞中之文。得以數言概之。曰理明詞暢。氣足機圓。要當知棘闡之文。與窗稿坊行書不同之處。且南闡之文。又與他省不同處。此則可以意會。難以言傳。惟平心下氣。細看南闡墨卷。將自得之。即最低下墨卷。彼亦自有

得手亦不可忽。此事最渺茫。古稱射蠲者視蠲如車輪。然後一發而貫。今能分別氣味。截然不同。當庶幾矣。汝曹兄弟叔姪。自來歲正月為始。每三六九日一會。作文一篇。一月可得九篇。不踈不數。但不可間斷。不可草草塞責。一題入手。先講求書理極透徹。然後布格遣詞。須語語有著落。勿作影響語。勿作艱澀語。勿作累贅語。勿作雷同語。凡文中鮮亮出色之句。謂之調。調有高卑踈密相閒。繁簡得宜處。謂之格。此等處最宜理會。深惱人讀時文。累千累百。而不知理會。於身心毫無裨益。夫能理會。則數十篇百篇已足。焉用如此之多。不能理會。則讀數千篇。與不讀一字等。徒使精神曠亂。臨文捉筆。依舊茫然。不過胸中舊套。應付。安有名理精論。佳詞妙句。奔匯於筆端乎。所謂理會者。讀一篇則先看其一篇之格。再味其一股之格。出落之次第。講題之發揮。前後豎義之淺深。詞調之華美。誦之極其熟。味之極其精。有與此等相類之題。有不相類之題。如何推廣擴充。如此讀一篇。有一篇之益。又何必多。又何能多乎。每見汝曹讀時文成帙。問之不能舉其詞。叩之不能言其義。粗者不能。況其精者乎。自誑乎。誑人乎。此絕不可解者。汝曹試靜思之。亦不可解也。以後當力除此等之習。讀文必期。



有用。不然寧可不讀。古人有言。讀生文不如玩熟文。必以我之精神。包乎此一篇之外。以我之心思。入乎此一篇之中。噫嘻。此豈易言哉。汝曹能如此用功。則筆下自然充裕。無補緝寒。踈支離。冗泛草率之態。汝每月寄所作九首來京。我看一會兩會。則汝曹之用心。不用心。務外不務外。瞭然矣。作文決不可使人代寫。此最是大家子弟陋習。寫文要工緻。不可錯落塗抹。所關於色澤不小也。汝曹不能面奉教言。每日展此一次。當有心會。幼年當專攻舉業。以為立身根本。詩且不必作。或可偶一為之。至詩餘則斷不可作。余生平未嘗為此。亦不多看。蘇辛尚有豪氣。餘則靡靡焉。可近也。

余久歷世塗。日在紛擾榮辱。勞苦憂患之中。靜念解脫之法。成此八章。自謂于人情物理。消息盈虛。略得其大意。醉醒卧起。作息往來。不過如此而已。顧以年增衰老。無由自適。二十餘年來。小齋僅可容膝。寒則溫室擁雜花。暑則垂簾對高槐。所自適于天壤間者。止此耳。求所謂煙霞林壑之趣。則僅託於夢想。形諸篇詠。皆非實境也。辛巳春分前一日。積雪初融。霽色迴暎。為三郎廷璐書此。遠寄江鄉。亦可知翁鍼砭氣質之偏。流覽造物之理。有此一知半見。當不至于汨

沒本來耳。

古稱仕宦之家。如再實之木。其根必傷。盲哉斯言。可為深鑒。世家子弟。其修行立名之難。較寒士百倍。何以故。人之當面待之者。萬不能如寒士之古道。小有失檢。誰肯面斥其非。微有驕盈。誰肯深規其過。幼而驕慣。為親戚之所優容。長而習成。為朋友之所諒恕。至於利交而諂。相誘以為非。勢交而諛。相倚而作慝者。又無論矣。人之背後稱之者。萬不能如寒士之直道。或偶譽其才品。而慮人笑其逢迎。或心賞其文章。而疑人鄙其勢利。甚且吹毛索癢。指摘其過失。而以為名高。批枝傷根。訛笑其前人。而以為痛快。至於求利不得。而嫌隙易生。于有無。依勢不能。而怨毒相形於榮悴者。又無論矣。故富貴子弟。人之當面待之也。恆恕。而背後責之也。恆深。如此則何由知其過失。而顯其名譽乎。故世家子弟。其謹飭如寒士。其儉素如寒士。其謙沖小心如寒士。其讀書勤苦如寒士。其樂聞規勸如寒士。如此則自視亦已足矣。而不知人之稱之者。尚不能如寒士。必也謹飭倍于寒士。儉素倍于寒士。謙沖小心倍于寒士。讀書勤苦倍于寒士。樂聞規勸倍于寒士。然後人之視之也。僅得與寒士等。今人稍稍能謹飭儉素。謙

下勤苦。人不見稱。則曰世道不古。世家子弟難做。此未深明於人情物理之故者也。我願汝曹常以席豐履盛為可危可慮。難處難全之地。勿以為可喜可幸。易安易逸之地。人有非之責之者。遇之不以禮者。則平心和氣。思所處之時勢。彼之施於我者。應該如此。原非過當。即我所行。十分全是。無一毫非理。彼尚在可恕。況我豈能全是乎。古人有言。終身讓路。不失尺寸。老氏以讓為寶。左氏曰。讓德之本也。處里閉之閒。信世俗之言。不過曰漸不可長。不過曰後將更甚。是大不然。人孰無天理良心。是非公道。揆之天道。有滿損虛益之義。揆之鬼神。有虧盈福謙之理。自古祇聞忍與讓。足以消無窮之災悔。未聞忍與讓。翻以釀後來之禍患也。欲行忍讓之道。先須從小事做起。余曾署刑部事五十日。見天下大訟大獄。多從極小事起。君子敬小慎微。凡事只從小處了。余行年五十餘。生平未嘗多受小人之侮。只有一善策。能轉灣早耳。每思天下事。受得小氣。則不至於受大氣。吃得小虧。則不於至吃大虧。此生平得力之處。凡事最不可想占便宜。子曰。放於利而行。多怨。便宜者。天下人之所共爭也。我一人據之。則怨萃於我矣。我失便宜。則眾怨消矣。故終身失便宜。乃終身得便宜也。汝曹席前人

之資。不憂饑寒。居有室廬。使有臧獲。養有田疇。讀書有精舍。良不易得。其有遊蕩非僻。結交淫朋匪友。以致傾家敗業。路人指為笑談。親戚為之浩歎者。汝曹見之。聞之。不待余言也。其有立身醜謹。老成儉樸。擇人而友。閉戶讀書。名日美。而業日成。鄉里指為令器。父兄期其遠大者。汝曹見之。聞之。不待余言也。二者何去。何從。何得。何失。何芳如芝蘭。何臭如腐草。何祥如麟鳳。何妖如鴛鴦。又豈俟余言哉。汝輩今皆年富力強。飽食溫衣。血氣未定。豈能無所嗜好。古人云。凡人欲飲酒博奕。一切嬉戲之事。必皆覓伴侶為之。獨讀快意書。對佳山水。可以獨自怡悅。凡聲色貨利。一切嗜欲之事。好之有樂。則必有苦。惟讀書與對佳山水。只有樂而無苦。今架有藏書。離城數里有佳山水。汝曹與其狎無益之友。聽無益之談。赴無益之應酬。曷若珍重難得之歲月。縱讀難得之詩書。快對難得之山水乎。我視汝曹所作詩文。皆有才情。有思致。有性情。非夢夢全無所得於中者。故以此諄諄告之。欲令汝曹安分省事。則心神寧謚。而無紛擾之害。寡交擇友。則應酬簡而精神有餘。不聞非僻之言。不致陷於不義。一味謙和謹飭。則人情服而名譽日起。制義者秀才立身之本根。本固則人不敢輕。自宜專力攻



之餘力及詩字亦可怡情。良時佳辰與兄弟姊夫輩一料理山莊。撫問松竹。以成余志。是皆於汝曹有益無損。有樂無苦之事。其味聰聽之義。

座右箴

立品

讀書

養身

擇友

右四綱

戒嬉戲

慎威儀

謹言語

溫經書

精舉業

學楷字

謹起居

慎寒暑

節用度

謝酬應

省宴集

寡交遊

右十二目

子弟自十七八以至廿三四。實為學業成廢之關。蓋自初入學至十五六。父師以童子視之。稍知訓子者。斷不忍聽其廢業。惟自十七八以後。年漸長。氣漸驕。漸有朋友。漸有室家。嗜慾漸開。人事漸廣。父母見其長成。師傅視為儕輩。德性未堅。轉移最易。學業未就。蒙昧非難。幼年所習經書。此時皆束高閣。酬應交遊。侈然大雅。博奕高會。自詡名流。轉盼廿五六歲。兒女累多。生計迫感。蹉跎潦倒。學殖荒落。余見人家子弟。半塗而廢者。多在此五六年中。棄幼學之功。貽終身



凡百物均可

以謙持之無

不得也萬事

則能保

學問則能

廣益接人

待物則和

則百凡不侮

心地坦然人

我皆收詭之

不用悻失夫

況於鬼神乎。於此理不啻反覆再三。極譬乎喻。書曰。滿招損謙受益。古昔聖賢。

殆無異辭。堯舜大聖人。而史稱之曰。允恭克讓。孔子甚聖德。及門稱之曰。恭。

儉讓。況乎中人之才。能越斯義。古云。終身讓路。不失尺寸。言讓之有益無損也。

世俗瞽談。妄謂讓。人則人欺之。甚至有尊長教其卑幼。無多讓。此極為亂道。以。

世俗論富貴家子弟。理不當為人所侮。稍有拂意。便自謂我何如人。而彼敢如。

是以加我。從旁人亦不知義理。用一二言挑逗之。遂爾氣填胸臆。奮不顧身。全。

不思富貴者。眾射之的也。羣妒之媒也。諺曰。一家溫飽。千金怨忿。惟當撫躬自。

返。我所得於天者已多。彼同生天壤。或係親戚。或同里閭。而失意如此。我不讓。

彼。而彼顧肯讓。我乎。嘗持此心。深明此理。自然心平氣和。即有拂意之事。逆耳。

之言。如浮雲行空。與我無涉。姚端恪公有言。此乃成就我福德相。愈加恭謹。以。

遜謝之。則橫逆之來。蓋亦少矣。願以此為熱火世界一帖清涼散也。

譚子化書。訓儉字最詳。其言曰。天子知儉。則天下足。一人知儉。則一家足。且儉。

非止節蓄財用而已也。儉於嗜慾。則德日修。體日固。儉於飲食。則脾胃寬。儉於衣服。則肢體適。儉於言語。則元氣藏。而怒尤寡。儉於思慮。則心神寧。儉於交遊。

則匪類遠。儉於酬酢。則歲月寬。而本業修。儉於書札。則後患寡。儉於干請。則品望尊。儉於僮僕。則防閑省。儉於嬉遊。則學業進。其中義蘊甚廣。大約不外於葆嗇之道。東坡千古才人。以百五十錢為一塊。每日只用畫叉挑取一塊。盡此錢為度。決不用明日之錢。汝輩中人。可無限制。陸梭山訓居家之法。最妙。以一歲所入。除完官糧外。分為三分。存一分。以為水旱及意外之費。其餘二分。析為十二分。每月用一分。但許存餘。不許過界。能從每日飲食雜用。加意節省。使一月之用。常有餘。別置一處。不入經費。留以為親戚友朋。小小周濟。緩急之用。亦速怨積德之道。可恃以長久者也。居家治生之理。恆產數言備之矣。雖不敢謂聖人復起。不易吾言。其於謀生。不啻左券。總之饑寒由於鬻產。鬻產由於債負。債負由於不經。相因之理。一定不易。余視之洞若觀火。仕宦之日。雖極清苦。畢竟略有交際。子弟習見習聞。由之不察。若以此作田舍度日之計。則立見其仆蹶。不可不深長思者也。人生儉嗇之名。可受而不必避。世俗每以為恥。不知此名一噪。則人絕覬覦之想。偶有所用。人即德之。所謂以虛名而受實益。何利如之。人生鬻稚。不離父母。入塾。則有嚴師傳督課。頗覺拘束。逮十六七歲時。父母漸



視為成人。師傅亦漸不嚴憚。此時知識初開。嬉遊漸習。則必視朋為性命。雖父母師保之訓。與妻孥之言。皆可不聽。而朋友之言。則投若膠漆。契若芳蘭。所與正則隨之而正。所與邪則隨之而邪。此必然之理。身驗之事也。余鐫一圖章以示子弟。曰保家莫如擇友。蓋有所歎息痛恨懲艾於其間也。古人重朋友而列之五倫。謂其志同道合。有善相勉。有過相規。有患難相救。今之朋友。止可謂相識耳。往來耳。同官同事耳。三黨姻戚耳。朋友云乎哉。汝等莫若就親戚兄弟中。擇其謹厚老成。可以相砥礪者。多則二人。少則一人。斷無目前良友。遂可得十數人之理。平時既簡於應酬。有事可以請教。若不如己之人。既易於臨深為高。又日聞鄙猥之言。汙賤之行。淺劣之學。不知義理。不習詩書。久久與之相化。不能卻而遠矣。此論語所以首誡之也。

人生第一件事。莫如安分。分者。我所得於天多寡之數也。古人以得天少者。謂之數奇。謂之不偶。可以識其義矣。董子曰。與之齒者去其角。附之翼者兩其足。嗇於此則豐於彼。理有乘除。事無兼美。余閱歷頗深。每從旁冷觀。未有能越此範圍者。功名非難非易。只在爭命中之有無。嘗譬之溫室養牡丹。必花頭中原。

結蕊。火培則正月早開。然雖開而元氣索然。花既不滿足。根亦旋萎矣。若本來不結花。即火培無益。既有花矣。何如培以沃壤。灌以甘泉。待其時至。敷華根本。既不虧。而花亦肥大經久。此余所深洞於天時物理。而非矯為迂濶之談也。曩時姚端恪公每為余言。當細玩不知命無以為君子章。朱注最透。言不知命。則見利必趨。見害必避。而無以為君子矣。為字甚有力。知命是一事。為君子是一事。既知命不能違。則儘有不必趨之利。儘有不必避之害。而為忠為孝。為廉為讓。綽有餘地矣。小人固不當取怨於他。至於大節目。亦不可說隨。得失榮辱。不必太認真。是亦知命之大端也。冢宰庫公曩與余同事。談及知命之義。時有山左鹿御史。以偶爾公函發遣。彼方在言路時。果拚得一箇流徒。甚麼本上不得。彼在位碌碌耳。究竟不能違一定之數。非謂人當冒險尋事。但素明此義。一旦遇大節所關。亦不至專計利害。犯名義矣。庫然之。